

四庫全書

集部

欽定四庫全書

古詩紀卷一百十七

明 馮惟訥 撰

陳第十

張君祖

按張君祖庾僧淵諸詩皆恬澹雅逸有晉風  
塵選陳詩無此作也考高僧傳有康僧淵竺

法雅者並在晉成帝時疑即此人歟廣宏明集云  
陳張君祖既不能明姑列于此以下爵里無考

詠懷三首

運形不標異澄懷恬無欲座可棲王侯門可迴金轂風  
來詠逾清鱗萃淵不濁斯乃玄中子所以矯逸足何必

翫幽閒青衿表離俗百齡苟未遐昨辰亦非促曦騰望  
舒暎曩今迭相燭一世皆逆旅安悼電往速區區雖非  
黨薰忘混礫玉恪神罔叢穢要在夷心曲

靈飈起回浪飛雲騰逆鱗苟擢南陽秀固集三造賓緬  
懷結寂夜味藻詠終晨延佇時無邁誰與拂流塵眇情  
寄極眇蕭條獨遨神相忘東溟裏何睠西朝津我崇道  
無廢長謠想義人

遙遊播荆衡杖策憇南郢遭動透浪迹遇靖恬夷性拊

卷從老語揮綸與莊詠遐眺獨緬想蕭神颯塵正時無  
喜惠偶絕韻將誰聽習一作君子茂芳標有欣徽音令穎  
敷陵霜倩葩熙三春盛拂翮期霄翔豈與桑榆競我混  
不材姿遺情忘雕暎雖非嶧陽椅聊以翮泗磬

贈沙門竺法願三首

沙門竺法願遠還西山作詩以贈因亦嘲之省其二

經聊為之讚

願於倫切

鬱鬱華陽嶽絕雲抗飛峯峭壁溜靈泉秀嶺森青松懸

巖廓崢嶸幽谷正寥籠丹崖棲竒逸碧室禪六通泊寂  
清神氣綿眇矯妙蹤止觀著無無還淨滯空空外物豈  
大悲獨往非玄同不見舍利弗

佛一作

受屈維摩公

至人如影響靈慧陶億劫應方恢權化兆類蒙慈悅冥  
冥積塵昧永在巖底閉廢聰無通照遺形不洞滅明哉  
如來降谿矣啓潛穴幽精淪朽壤孰若阿維察遙謝睟  
玄疇何為自矜潔

邈邈慶成標峨峨浮雲嶺峻蓋十二嶽獨秀闡浮境丹

流環方基瑤堂臨峭頂澗滋甘泉液崖蔚芳芝穎翹翹  
美化倫眇眇陵巖正肅拱望妙覺呼吸晞齡永苟能夷  
沖心所憇靡不淨萬物可逍遙何必栖形影勉尋大乘  
軌練神超勇猛

道樹經讚

峨峨王舍國鬱鬱靈竹園中有神化長空觀體善權私  
呵晞光景豈識真跡端恢恢道明玄解發至神歡飄忽  
凌虛起無云受慧難

三昧經讚

迹超十二燒戒由三昧成賢行極妙住道志慧以明九  
本既殊動四禪不同冥淵哉不起滅始自無從生借問  
道氣倫安測泥洹靈

答庾僧淵

茫茫混成始豁矣四天朗三辰還須彌百億同一像靈  
和陶氤氳會之有妙常一作長大慈濟羣生冥感如影響  
蔚蔚沙彌衆粲粲萬心仰誰不欣大乘兆定於玄曩三

法雖成林居士亦有黨不見虬與龍灑鱗凌霄上沖心  
超遠寄浪懷邈獨往衆妙常所睇維摩余所賞苟未體  
善權與子同髯髻悠悠誠滿域所遺在廢想

庾僧淵

代答張君祖

省贈法顧詩經通妙遠疊疊清綺雖云言不盡意殆  
亦幾矣夫詩者志之所之意迹之所寄也忘妙玄解  
神無不暢夫未能冥達玄通者惡得不有仰鑽之詠



哉吾想茂得之形容雖栖守殊塗標寄玄同仰代答  
之未足盡美亦各言其志也其辭曰

真樸運既判萬象森已形精靈感冥會變化靡不經波  
浪生死徒彌綸始無名捨本而逐末悔吝生有情胡不  
絕可欲反宗歸無生達觀均有無蟬蛻豁朗明逍遙衆  
妙津栖凝於玄冥大慈順變通化育曷常停幽閒自有  
所豈與菩薩并摩詰風微指權道多所成悠悠滿天下

孰識秋露情

又答張君祖

遙望華陽嶺紫霄籠三辰瓊巖朗璧室玉潤灑靈津丹  
谷挺樛樹季穎奮暉融飈衝天籟逸響互相因鸞鳳  
翔迴儀虬龍灑飛鱗中有沖漠士耽道玩妙均高尚凝  
玄寂萬物息自賓棲峙遊方外超世絕風塵翹想晞眇  
蹤矯步尋若人咏嘯舍之去榮麗何足珍濯志八解淵  
遼朗豁冥神研幾通微妙遺覺忽忘身居士成有黨顧  
盼非疇親借問守常徒何以知反真

何處士

廣弘明集云陳  
從事何處士

春日從將軍遊山寺

蘭庭厭俗賞柰苑矚年華始入香山路仍逢火宅車  
慈門數片葉道樹一林花雖悟危藤鼠終悲在篋蛇

別才法師於湘還郢北

乘杯事將遠捧袂忽無聊南楚長沙狹西浮郢路遙  
離庭花已散別戍馬新驕明日分千里相思非一條

敬詔解法師所贈

道林俗之表慧速廬之阿買山即高世乘杯且渡河法  
雨時時落香雲片片多若為將羽化來濟在塵羅

通士人篇

龍宮既入道鳳闕且辭榮禪龕八想淨義窟四塵輕香  
蓋法雲起花燈慧火明自然忘有著非止悟無生

蘇子卿

朱鷺

玉山一朱鷺萬里一作容與入玉畿欲向天池飲還遠上林

飛金堤曬羽翮丹水浴毛衣非貪葭下食懷思自遠歸

艾如張

誰在閒門外羅家諸少年張機蓬艾側結網槿籬邊若  
能飛自勉豈為繒所纏黃雀儻為誠朱絲猶可延

梅花落

中庭一樹梅寒多葉未開祇言花是雪不悟有香來上  
郡春恒晚高樓年易催織書偏有意教逐錦文回

紫駟馬

藝文樂府並  
作祖孫登

候騎指樓蘭長城迴路難嘶從風處斷骨往水中寒飛  
塵暗金勒落淚灑銀鞍抽鞭上關路誰念客衣單

南征

一朝遊桂水萬里別長安故鄉夢中近邊愁酒上寬劔  
鋒但須利戎衣不畏單南中地氣暖少婦莫愁寒

陽縉

賦得荆軻

樂府作  
荆軻歌

函關使不通燕將重深功長虹貫白日易水急寒風壯

髮危冠下七首地圖中琴聲不可識遺恨汶秦宮

照帙秋螢

秋牕餘照盡入暗早螢來忽聚還同色恒然詎落灰飛  
影黃金散依帷縹帙開含明終律祖不息夜月空徘徊

俠客控絕影

陸士衡擬古詩曰俠客  
控絕景都人驟玉軒

青門小苑物華新花開鳥弄會芳春仙掌層臺浮麗日  
長楸廣路起紅塵園中追尋桃李徑陌上逢迎遊俠人

遊俠英名馳上國，人馬意氣俱相得。  
白玉鹿盧秋水劍，青絲宛轉黃金勒。  
復有魚目並龍文，躡影追風本絕羣。  
影入吳門疑曳練，形來西北似浮雲。  
寄語幽并馳射客，未肯推門一作名持借君。

陽慎

從駕祀麓山廟

聖德憂民暇，麾旆謁山靈。  
畫航汎北渚，文馬侍東平。  
春浦戈鋌照寒林，銃吹鳴依稀。  
長安驛蕭條，都尉城井泉。



能共動江帆得分行  
牕幽細網合堦靜  
落花明欄巢始入  
燕軒樹已遷鶯  
菲菲蘭俎馥  
淡淡桂樽清  
銀塘藝文作堂

日影盡玉座舞衣輕

賀力牧

關山月

重關歛暮煙  
明月下秋前  
照石疑分鏡  
臨弓似引弦  
霧暗迷旗影  
霜濃濕劔蓮  
此處離鄉客  
遙心萬里懸

亂後別蘓州人

徘徊睇閭闔，悵望極姑蘓。慨矣嗟荒運，悲哉惜霸圖。子  
常終覆郢，宰詒遂亡吳。石隕星方暗，山崩川自枯。周京  
推棧撲，漢社落枌榆。宮毀無巢燕，城空餘堞烏。茲邦號  
端委，多士自相趨。照廡同燕石，光車等魏珠。言離已惆  
悵，念別更踟躕。若訪任公子，求余東海隅。

伏知道

從軍五更轉五首

一更刁斗鳴，校尉連連城。遙聞射鵰騎，懸憚將軍名。

二更愁未央高城寒夜長試將弓學月聊持劍比霜  
三更夜警新橫吹獨吟春彊聽梅花落誤憶柳園人  
四更星漢低落月與雲齊依稀北風裏胡笳雜馬嘶  
五更催送壽曉色映山頭城烏初起堞更人悄下樓

詠人娉妾仍逐琴心

春色轉相催佳人心自迴長卿琴已弄秦嘉書未來桂  
冠易分綬薦枕缺因媒染香風卽度登垣花正開貞樓  
若高下如何上陽臺

賦得招隱

招隱訪仙楹丘中琴正鳴桂叢侵石路桃花隔世情薄  
暮安車近林喧山鳥驚

毛處約

雉子斑

春物始芳菲春雉正相追澗響連朝雉花光帶錦衣窺  
跡時移影驚媒或亂飛能使如皋路相逢巧笑歸

陸系

有所思

別念限城闈，還思樓上人。  
淚想離前落，愁聞別後新。  
月來疑舞扇，花度憶歌塵。  
只看今夜裏，那似隔河津。

獨孤嗣宗

紫駟馬

倡樓望早春，寶馬度城闈。  
照曜桃花逕，蹀躞採桑津。  
金羈麗初景，玉勒染輕塵。  
遠聽珂驚急，猶一作知是畫眉人。

李燮

紫駟馬

紫燕忽踟躕紅塵起路隅  
圍人移首宿騎士逐靡蕪  
三邊追黠虜一鼓定疆胡  
安用珂為玉自有汗成珠

江暉

劉生

五陵多美選六郡盡良家  
劉生代豪蕩標舉獨榮華  
寶劍長三尺金樽滿百花  
唯當重意氣何處有驕奢

雨雪曲

英華作玉珂今  
從樂府作江暉

邊城風雪至遊子自心悲風哀笳弄斷雪暗馬行遲輕  
生本為國重氣不關私恐君猶不信撫劍一揚眉

何楫

班婕妤怨

齊紈既逐篋趙舞即凌人履跡隨恩故階苔逐恨新獨  
臥銷香炷長啼費錦中庭草何聊賴也持秋當春

蕭淳

長相思

長相思久離別新燕參差條可結壺闌遠鴈書絕對雲  
恒憶陣看花復愁雪猶有望歸心流黃未剪截

孔仲智

羈謠

芳杜觴春酒髻髯傷山時徒歌不成樂空以羈自悲羈  
悲懷土心遽復還山路迨及春復時無使春光暮

蕭有

射雉



二月春暈動曹王挾妬媒插翳依花合艾場向野開隔  
田聞雉近橫溪見影來弦明青壓碎箭落錦衣推今日  
如臯路能將巧笑迴

徐湛

玉臺作  
徐湛

賦得班去趙姬升

鮑明遠白頭吟曰申黜  
褒女進班去趙姬升

班姬與飛燕俱侍漢王宮不意恩情歇偏將衰草同香  
飛金輦外苔上玉階中今日悲團扇非是為秋風

吳尚野

詠鄰女樓上彈琴

青樓誰家女開牕弄碧弦  
貌同朝日麗裝競午花然  
一彈哀塞鴈再撫哭春鶉  
此情人不會東風千里傳

吳思玄

閨怨

金風響洞房佳人心自傷  
淚隨明月下愁逐漏聲長  
燈前羞獨鵠枕上怨孤凰  
自覺鴛帷冷誰憐珠被涼

殷謀

日出東南隅行

秦樓出佳麗正值朝日光陌頭能駐馬花處復添香

賈馮吉

自君之出矣

自君之出矣紅顏轉憔悴思君如明燭煎心且銜淚

何曼才

為徐陵傷妾

遲遲衫掩淚  
憫憫恨縈胸  
無復專房日  
猶望下山逢

許倪

破扇

蔽日無全影  
搖

玉臺作迎

風有半涼不堪  
鄣巧笑猶足動衣

香

蕭騷

一作隣

詠衲複

疑即衲服女人脇衣也  
丹鉛餘錄作詠複裙

的的

一作晶晶

金紗淨離離  
寶撮

一作縫

分纖腰非學楚寬帶

為思君

蕭琳

隔壁聽妓

徒聞弦管切不見舞腰迴  
唯有歌梁共塵飛一半來

陳叔達

詠空鏡臺

即今妝飾廢凋零衢路間  
嫦娥與明月相共落關山

釋惠標

涉獵有才思陳寶  
應反以預謀坐誅

詠山三首

靈山蘊麗名秀出寫蓬瀛香鑪帶煙上紫蓋入霞生霧  
捲蓮峯出崑開石鏡明定知丘壑裏併佇白雲情

娥眉信重險天日本仙居金華抱丹竈玉笥蘊神書幽  
人披薜荔怨妾採靡蕪紫巖無暮雨何時送故夫

丹霞拂層閣碧水泛蓬萊鰲岫含煙聳蓮崖照日開松  
門夾細葉石磴染新苔能令平子見淹留未肯回

詠水

曾添疎勒井經涌貳師營  
玉津花色亮銀溪  
錦磧明舟如空裏  
沈人似鏡中行  
持將符上善  
利得動高情

詠孤石

中原一孤石地理不知年  
根含彭澤浪頂入香鑪  
煙崖成二鳥翼峯作一  
芙蓉何時發東武今來鎮蠡川

贈陳寶應

梁書曰寶應據閩中與錙異潛有異謀遂起兵反  
沙門慧標作五言詩以送之寶應甚悅慧標齋以  
示虞寄寄謂所親曰標公既以此始  
必以此終後寶應敗標從坐伏誅

送馬猶臨水，離旗稍引風。好看今夜月，當照紫微宮。

曇瑗

金陵人以戒律處世住持為要陳宣帝敕瑗通海國僧以為僧正

遊故苑

續高僧傳曰瑗每上鍾阜諸寺修道賢觸興賦詩覽物懷古洪偃法師傲寄泉石偏見朋從把臂

郊坰同遊故苑瑗題樹為詩曰

丹陽松葉少，白水黍苗多。浸淫下客淚，哀怨動民歌。春  
溪度短葛，秋浦沒長莎。麋鹿自騰倚，車騎絕經過。蕭條  
四野望，惆悵將如何。



釋洪偃

俗姓謝氏會稽山陰人風神秀穎弱齡悟道梁太宗在東朝愛其爲秀欲令還俗引爲學

士偃執志不從會講重雲抗言高論甚爲武帝所優禮梁亂避地于縉雲陳武革命乃復出都天嘉

五年卒偃始離俗遠於造化惟學是務每緣情觸興輒叙其致而文彩灑落罕有嗣者

遊故苑

禪藻集誤作何偃

龍田留故苑  
汾水結餘波  
悵望傷遊目  
辛酸思緒多  
涼

颶慘高樹濃  
露變輕蘿  
澤葵猶帶井  
池竹尚一作侵荷

秋風徒自急  
無復白雲歌

登吳昇平亭

一作遊若邪雲門精舍

蕭蕭物候晚肅肅天望清旅人聊策杖登高蕩客情川  
原多舊迹墟里或新名宿烟浮始旦朝日照初晴獨遊  
乏徒侶徐步寡逢迎信矣非吾託賞心何易并

遊鍾山之閒善定林息心宴坐引筆賦詩

杖策步前嶺褰裳出外扉輕蘿轉蒙密幽逕復紆威樹  
高枝影細山盡鳥聲稀石苔時滑屣蟲網乍粘衣澗傍  
紫芝擘巖上白雲霏松子排煙去堂生寂不歸窮谷無  
還往攀桂獨依依

釋智愷

俗姓曹氏住揚都寺與法泰同往嶺表素積道風辭力殷贍卒於陳光大二年

臨終詩

禪藻集作法泰詩題云遘疾並誤

千月

一作秋

本難滿三時理易傾石火無恒燄電光非久

明遺文空滿筭徒然昧後生泉路方幽曠寒隴向淒清  
一隨朝露盡唯有夜松聲

高麗定法師

詠孤石

迴石直生空平湖四望通巖根恒灑浪樹杪鎮搖風偃

流還漬影侵霞更上紅獨拔羣峯外孤秀白雲中

陳少女

寄夫

自君上河梁蓬首臥蘭房安得一樽酒慰妾九迴腸

郊廟歌辭

陳太廟舞辭七首

隋書樂志曰陳初武帝詔求宋齊故事太常卿周弘讓奏曰齊氏承宋咸用元徽舊式宗祀朝饗奏樂俱同惟北郊之禮頗有增益皇帝入壇門奏永至飲福酒奏嘉胙太尉亞獻奏凱容埋牲奏諫幽

帝還便殿奏休成衆官並出奏肅成此乃元徽所  
闕永明六年之所加也唯送神之樂宋孝建二年  
秋起居注云奏肆夏永明中改奏昭夏帝  
遂依之是時並用梁樂唯改七室舞辭

凱容舞

皇祖步兵  
府君室

於赫皇祖宮牆高嶷邁彼厥初成茲峻極縵樂簡簡  
寢翼翼裸饗君存惟靈靡測

凱容舞

正員府  
君室

昭哉上德浚彼洪源道光前訓慶流後昆神猷綿邈清  
廟斯存以享以祀惟祖惟尊

凱容舞

懷安府  
君室

選辰崇饗飾禮嚴敬靡愛牲牢蕪馨菜盛明明烈祖龍  
光遠映肇我王風形斯舞詠

凱容舞

皇高祖安  
成府君室

道遙積慶德遠昌基永言祖武致享從思九章停列八  
舞迴墀靈其降止百福來綏

凱容舞

皇曾祖太  
常府君室

肇迹締基義標鴻篆恭惟載德瓊源方闡享薦三清筵

陳四璉增我堂構式敷帝典

景德凱容舞

皇祖景  
皇帝室

皇祖執德長發其祥顯仁藏用懷道韜光寧斯閔寢合  
此蕭鄉永昭貽厥運符翦商

武德舞

皇考高祖  
武皇帝室

烝哉聖祖撫運升離道周經緯功格玄袂方軒邁扈比  
舜陵媯緝熙是詠欽明在斯雲雷邁屯圖南共舉大定  
揚越震威衡楚四輿宅心九疇還敘景星出翼非雲入

呂德暢容辭慶昭羽綴於穆清廟載揚徽烈嘉玉既陳  
豐盛斯潔是將是享鴻猷無絕

禘歌謠辭

齊雲觀歌

隋書五行志曰陳後主造齊雲觀  
國人歌之功畢而為隋師所虜

齊雲觀寇來無際畔

江東謠

隋書五行志曰陳初有童謠其後陳主果為韓擒  
所敗擒本名擒虎黃斑之謂也破建康之始復乘



青驄馬往反  
時節皆應

黃斑青驄馬發自壽陽溪來時冬氣末去日春風始

陳初童謠

御路種竹篠蕭蕭已復起合盤貯蓬塊無復揚塵已

又

日西夜烏飛拔劍倚梁柱歸去來歸山下

張種歌

陳書曰張種少恬靜居處雅正不  
妄交遊傍無造請時人為之語曰

宋稱敷演梁則卷充清處學尚種有其風

二賀歌

唐書曰賀臨仁越州山陰人在陳與兄  
德基師事周弘正以文辭稱人為語曰

學行可師賀德基文質彬彬賀德仁

古詩紀卷一百十七

欽定四庫全書

古詩紀卷一百十八

明 馮惟訥 撰

北魏第一

孝文帝

初姓拓拔氏太和二年改姓元氏諱宏獻文帝太子也恭儉仁孝出於天性好讀書才藻

富贍加以雄才大略愛奇好士遷都洛陽風移俗易北朝之盛未有過之者也

縣瓠方丈竹堂饗侍臣聯句

北史曰策中書侍郎鄭道昭從征河北孝文饗臣於縣瓠方丈竹堂道昭與凡懿俱侍坐樂作酒酣

孝文乃作歌

欽定四庫全書

白日光天兮無不曜江左一隅獨未照帝願從聖明兮

登衡會萬國馳誠混內一作外雲雷大振兮天門

闢率土來賓一正歷鄭舜舞干戚兮天下歸文德遠被

莫不思鄭皇風一鼓兮九地匝戴日依天清六合邢

遵彼汝墳兮昔化貞未若今日道風明帝文王政教兮

暉江沼寧如大化光四表宋

節閔帝諱恭字修業廣陵惠王羽之子也正始中襲爵位給事中黃門侍郎以元又擅權託稱瘖

病絕言一紀及莊帝崩命朱世隆廢長廣王奉帝即位改元普泰在位一年高歡廢帝而立平陽王

修是曰孝武帝帝  
遇弑年三十五

詩一首

朱門久可患紫極非情玩顛覆立可待一年三易換時  
運正如此惟有修真觀

聯句詩

帝使薛孝通等相嘲以酒為韻

既逢堯舜君願上萬年壽

孝通

平生好玄默慚為萬國首

帝

帝曰卿所謂壽豈得徒然便命酌酒仍命更嘲孝通  
以忠為韻

聖主臨萬機享世永無窮元 豈唯被豐草方亦及昆蟲

孝通朝賢既濟濟野苗又芄芄元 君臣體魚水書軌一華

戎帝 微臣信慶渥何以答華嵩孝通

彭城王勰魏獻文帝第六子於孝文帝為兄弟輔相

肇護構所殺及子孝莊帝  
嗣統追尊為文穆皇帝

應制賦銅鞮山松

北史曰：魏從孝文帝幸代都，次于上黨之銅鞮山，路傍有大松樹十數株，帝賦詩示魏曰：「吾作詩雖不七步，亦不言速，汝可作之。」比至吾間，令就也。魏時去帝十步，且行且作，未至帝所而就。

問松林松林經幾冬，山川何如昔。風雲與古同。

孝莊帝

諱子攸，彭城王。魏第三子。明帝時封武城縣公，進封長樂王。明帝崩，大都督朱榮謀廢立，以帝家有忠顯，且兼人望，立為帝。改元永安，後為朱兆所弒。年二十四，廟號敬宗。

臨終詩

伽藍記曰：莊帝既誅，朱榮右僕射朱世隆至高都，立長廣王曄為主，遣潁川王朱兆舉兵向京師。大軍失利，遂執帝還晉陽。縊於三級寺。帝臨崩作五言詩曰：



權去生道促憂來死路長  
懷恨出國門含悲入鬼鄉  
隧門一時閉幽庭豈復光  
思鳥吟青松哀風吹白楊  
昔來聞死苦何言身自當

濟陰王暉業

景穆帝之曾孫濟陰王  
小新成之孫也  
位司空太尉加特進領中書  
監錄尚書

事北齊初降封美陽  
縣公後為文宣所殺

感遇

北史本傳曰暉業在魏以時運漸  
謝不復圖全唯事飲唱嘗賦詩曰

昔居王道泰濟濟富羣英  
今逢世路阻狐兔鬱縱橫

中山王熙

字子真景穆帝之曾孫中山王英之子累遷光祿勳湘州刺史初熙兄弟竝為清河

王懌所昵及劉騰元又隔絕二宮矯詔殺懌熙乃起兵討之為其長史柳元章等所執又殺之

絕命詩二首

義實動君子主辱死忠臣何以明是節將解七尺身

右示

察史

平生方寸心殷勤屬知已從今一銷化悲傷無極已

右別

知友北史本傳曰熙既藩王加有文學風氣甚高始鎮鄴知友才學之士素翻李琰之李神雋王誦兄弟裴敬憲等或餞於河梁賦詩告別及將死復與知故書恨志意不遂時人矜之

韓延之

字顯宗南陽堵陽人仕晉位平西府錄事參軍劉裕招之不屈後奔姚興明帝泰常二年

入魏為武牢鎮將賜爵魯陽侯一云韓顯宗字茂親

### 贈中尉李彪

賈生謫長沙董儒詣臨江愧無若人跡忽尋兩賢蹤追  
昔渠閣游策駑厠羣龍如何情願奪飄然獨遠從痛哭  
去舊國銜淚屆新邦哀哉無援民嗷然失侶鴻彼蒼不  
我聞千里告志同

劉昶

字休道宋文帝第九子封晉熙王位中書令廢帝立以為徐州刺史人問言昶有異志帝欲加

誅討昶即起兵統內數郡無應者知事不捷乃奔魏甚為孝文所禮重遷使持節都督吳越彭楚諸軍事大將軍鎮徐州卒諡曰明

### 斷句

南史曰昶兵敗奔魏棄母妻惟攜妾一人騎馬自隨在道慷慨為斷句

白雲滿鄣來黃塵暗天起關山四面絕故鄉幾千里

蕭綜

字世謙梁武帝第二子封豫章王普同四年為都督南兗州刺史鎮彭城奔魏歷司徒太尉尚

壽陽公主在魏不得志嘗作聽鍾鳴悲落葉以申其志

### 聽鍾鳴

歷歷聽鍾鳴當知在帝城西樹隱落月東窻見曉星霧  
露肫肫未分明烏啼啞啞已流聲驚客思動客情客思  
鬱縱橫翩翩孤鴈何所棲依依別鶴半夜啼今歲行已  
暮雨雪向淒淒飛蓬旦夕起楊柳尚翻低氣鬱結涕滂

沅愁思無所託強作聽鍾歌

伽藍記曰洛陽城東建陽里有臺高三丈上作二精

舍有鍾撞之聞五十里太后移在宮內置凝開堂初  
梁敬章王蕭綜聞此鍾聲遂造聽鍾歌三首行於世

### 悲落葉

悲落葉聯翩下重疊重疊落且飛從橫去不歸長枝交

陰昔何密黃鳥闕闕動相失夕葉雜凝露朝花翻亂日  
亂春日起春風春風春日此時同一霜兩霜猶可當五  
晨六旦已颯黃乍逐驚風舉高下任飄颺悲落葉落葉  
何時還夙昔共根本無復一相關各隨灰土去高枝難

### 重攀

高允

字伯恭渤海蓆人少好學博通經史神龜初叅  
樂平王軍事獻文未授懷州刺史太和二年拜

鎮軍大將軍領中秘書事加光祿大夫  
事五帝出入三省五十餘年初無譴咎

### 羅敷行

邑中有好女姓秦字羅敷巧笑美回盼鬢髮復凝膚脚  
著花文履耳穿明月珠頭作墮馬髻倒枕象牙梳姆姆  
善趨步襜襜長裾王侯為之顧駟馬自踟蹰

王子喬

王少卿王少卿超升飛龍翔天庭遺儀景雲漢酬光鷲  
電逝忽若浮騎日月從列星跨騰八廓踰杳冥尋元氣  
出天門窮覽有無究道根

答宗欽

十三  
章

高允為著作即與崔浩同撰史宗欽贈詩以相規  
諷允答之云云後崔浩竟坐暴揚國忌與宗欽同  
被誅允以太  
子救得免

湯湯流漢藹藹南都載稱多士載耀靈珠邈矣高族世  
記丹圖啓基郢城振彩涼區

吾生朗到誕發英風紹熙前緒奕世克隆方圓備體淑  
德斯融望傾羣雋響駭華戎

響駭伊何金聲允著匡贊西藩拯厥時務肅志琴書恬  
心初素潛思淵渟秀藻雲布



上天降命祚鍾有代協耀紫宸與乾作配仁邁春陽功  
隆覆載招延隱叟永貽大賚

伊余櫟散才至庸微遭緣幸會忝與樞機竊名華省廁  
足丹墀愧無螢燭少益天暉

明外非諭信漸難兼體卑處下豈曰能謙進不弘道退  
失淵潛既慚朱闕亦愧閭閻

史班稱達揚蔡致深負荷典策載蹈於心四轍同軌履  
車相尋敬承嘉誨永佩明箴

遠思古賢內尋諸已仰謝丘明長揖南史選武雖存高  
蹤難擬夙興夕惕豈獲恬止

世之圯矣靈運未通風馬殊隔區域異封有懷西望路  
陝莫從王澤遠灑九服來同

在昔平吳二陸稱寶今也尅涼吾生獨矯道映儒林義  
為羣表我思與之均於紵縞

仁乏田蘇量非叔度韓生屬降林宗仍顧千載曠遊邁  
茲一遇藻詠風流鄙心已悟

年時迅邁物我俱逝任之斯通擁之則滯結駟貽塵屢  
空亦敬兩間可守安有回賜

詩以言志志以表丹慨哉刎頸義已中殘雖曰不敏請  
事金蘭爾其勵之無忘歲寒

詠貞婦彭城劉氏 八章

渤海封卓妻劉氏彭城人成婚一夕卓官於京師  
以事見法劉氏在家忽形夢想知卓已死哀泣不  
止經旬凶問果至遂憤歎而終時人比之秦嘉  
妻云高允念其義高而名不著乃為之詩曰

兩儀正位人倫肇甄爰制夫婦統業承先雖曰異族氣

猶自然生則同室終契黃泉

封生令達卓為時彥內協黃中外兼三變誰能作配克  
應其選實有華宗挺生淑媛

京野勢殊山川乖互乃奉王命載馳在路公務既弘私  
義獲著因媒致幣邁止一暮

率我初冠眷彼弱笄形由禮比情以趣諧忻願難常影  
跡易乖悠悠言邁戚戚長懷

時值險屯橫離塵網伏鎖就刑身分土壤千里雖遐應

如影響良嬪洞感發於夢想

仰惟親命俯尋嘉好誰謂會淺義深情到畢志守窮誓  
不二醮何以驗之殞身是效

人之處世孰不厚生心存於義所重則輕結憤鍾心甘  
就幽冥永捐堂宇長辭母兄

茫茫中野翳翳孤丘葛藟冥蒙荆棘四周理苟不昧神  
必俱游異哉貞婦曠世靡儔

宗欽

字欽若金城人仕沮渠蒙遜為中書郎  
世子洗馬太武平涼州入魏拜著作郎

贈高允 十二章

鬼我恒嶺澗瀆滄溟山挺其和水燿其精啓茲令族應  
期誕生華冠衆彥偉邁羣英

於穆吾子含貞藉茂如彼松竹陵霜擢秀味老思冲玩  
易體復戢翼九臯聲溢宇宙

我皇龍興重離疊映剛德外彰柔明內鏡乾象奄氣坤  
厚山競風無殊音俗無異徑

經緯曰文著述曰史斟酌九流錯綜幽旨帝用訓詁明

發虛擬廣闊四門披延髦士

爾應其求翰飛東觀口吐瓊音手揮霄翰彈毫珠零落  
紙錦粲墳無凝訃典無滯泮

山降則謙含柔為信林崇日漸明外一作斯進有邈夫

子兼茲四慎弱而難勝通而不峻

南薰邈矣史功不申固傾佞竇雄穢羨新遷以陵腐邕  
由卓泯時無逸勒路盈推輪

尹佚謨周孔明迷魯抑揚羣致憲章三五昂昂高生纂

我邀武勿謂古今建規易矩

自昔索居沈淪西藩風馬既殊標榜莫緣開通有運閭  
遇當年披衿暫面定交一言

諮疑祕省訪滯京都水鏡叔度洗吞田蘇望儀神婉即  
象心虛悟言禮樂採研詩書

履霜悼遷撫節感變嗟我年邁迅踰激電進乏由賜退  
非回憲素髮掩玄枯顏落禿

文以會友友由知己詩以明言言以通理盼坎迷流覲



良閣止伊爾虬光肆鱗曲水

段承根

威武姑臧人好學機辯有文思崔浩見而奇之言之魏太武請為著作即甚為燉煌公李

寶所敬待後以崔

浩撰史事同被誅

贈李寶

七章

世道衰陵淳風殆  
緬衢交問鼎路盈訪  
壘狗競爭馳天機  
莫踐不有真宰  
榛棘誰翦

於皇我后重明襲  
煥文以息煩武以  
靜亂剖蚌求珍搜  
巖采榦野無投綸  
朝盈逸翰

自昔涼季林焚淵涸矯矯公子鱗羽靡託靈慧雖奮袂  
氛未廓鳳戢崑丘龍潛玄漠

數不常擾艱極則夷奮翼幽裔翰飛京師珥蟬紫闥仗  
節方畿弼我王度庶績緝熙

自余幽淪眷叅舊契庶庇餘光優游卒歲忻路未淹離  
轡已際顧難分歧載張載繼

聞諸交舊累聖疊曜淳源雖漓民懷余劭思樂哲人靜  
以鎮躁藹彼繁音和此清調

詢下曰文辯許曰明化由禮治政以寬成勉崇仁教播

德簡刑傾首景風遲聞休聲

胡叟

字倫許安定臨涇人以姚氏將衰遂入長安觀風化後入沮渠牧犍不得志乃歸魏賜爵復始

男家於密雲倫許好屬文既善典雅之辭又工鄙俗之句

示程伯達

北史本傳曰叟入沮渠牧犍牧犍遇之不重叟乃為詩示所知廣平程伯達其略曰

羣犬吠新客佞暗排踈賓直途既已塞曲路非所遵望

衛悅祝鮀盼楚悼靈均何用宣憂懷託翰寄輔仁

王肅

字恭懿琅邪臨沂人仕齊為秘書丞父奐及兄弟竝為南齊武帝所殺太和中奔魏孝文虛衿

待之累遷尚書令宣武時尚陳留公主後以破齊進位開府儀同三司封昌國縣侯揚州刺史

### 悲平城

悲平城驅馬入雲中陰山常晦雪荒松無罷風

祖瑩

字元珍范陽道人孝文時拜太學博士累遷國子祭酒領給事黃門侍郎孝武登阼封文安縣

子天平初進爵為伯

### 悲彭城

北史曰尚書令王肅於省中詠悲平城詩彭城王颺甚嗟其美欲使更詠乃失語云公可更為誦悲

彭城詩肅戲總云何意呼悲平城為彭城也總有  
慙色瑩在座即云悲彭城王公自未見肅云可為  
誦之瑩應聲為之肅  
甚嗟賞總亦大悅

悲彭城楚歌四面起屍積石梁亭血流睢水裏

常景

字永昌河內溫人聰敏有才思雅好文章孝文  
用為門下錄事累遷車騎將軍右光祿大夫秘書

書監明帝幸國子寺詔百官作釋奠詩以景作為  
美經涉山水悵然懷古乃擬劉琨作扶風歌十五  
首

讚四君

北史曰景淹滯門下積歲不至顯官以蜀司馬相  
如王褒嚴君平揚子雲皆有高才而無重位乃託

意以  
謂之

長卿有艷才直致不羣性鬱若春煙舉皎如秋月映遊  
梁雖好仁仕漢常稱病清貞非我事窮達委天命

右司馬相如

王子挺秀質逸氣干青雲明珠既絕俗白鵠信驚羣才  
世苟不合遇否途自分空枉碧雞命徒獻金馬文

右王褒

嚴君情沉靜立志明霜雪味道綜微言端著演妙說才

屈羅仲口位結李強舌素尚邁金貞清標陵玉徹

右巖君平

蜀江導清流揚子挹餘休含光絕後彥覃思邈前修世  
輕久不賞玄談物無求當途謝權寵置酒得閒遊

右揚雄

鹿念

字永吉濟陰乘氏人初為真定公元子直國中尉累拜金紫光祿大夫兼尚書右僕射天平中

除梁州刺史為反者

鄭崇業執送闕西

諷真定公二首

北史曰愈為真定公元子直國中尉恒勸以忠廉之節嘗賦五言詩云云子直少有令聞愈欲善其終故以諷馬

嶧山萬丈樹雕鏤作琵琶由此材高遠弦響藹中華  
援琴起何調幽蘭與白雪絃管韻未成莫使弦響絕

董紹字興遠新蔡銅陽人起家四門博士累遷洛陽

刺史丞及周文登阼以議論朝廷賜死

### 高平牧馬詩

北史曰紹為賀拔岳諮議參軍岳  
攜紹於高平牧馬紹悲而賦詩曰



走馬山之阿馬渴飲黃河寧謂胡關下復聞楚客歌

馮元興

字子威東魏郡肥鄉人少有操尚舉秀才後為元乂所知引為殿中郎遷侍讀普泰初為

光祿大夫領

中書舍人

浮萍

北史曰元興世寒因元乂之勢託其交道相為引用乂既賜死興亦被廢乃為浮萍詩以自喻

有草生碧池無根綠水上脆弱惡風波危微苦驚浪

古詩紀卷一百十八

欽定四庫全書

集部  
古詩紀卷一百  
十九至  
二十二

詳校官檢討臣德生

侍讀臣孫球覆勘

總校官知縣臣楊懋珩

校對官編修臣吳裕德

謄錄監生臣孟照

欽定四庫全書

古詩紀卷一百十九

明 馮惟訥 撰

北魏第二

陽固

字敬安北平無終人太和中從大將軍劉昶府法曹行參軍在軍勇決昶奇之言之孝文累遷

尚書侍御史明帝即位除尚書考功郎中京兆王繼為司徒辟固為從事中郎解除前軍將軍卒諡

文曰

刺讒詩

北史曰宣武末中尉王顯當權固每直言其過以此街固又有人問之顯因奏固免官遂闕門自守

作刺讒疾  
倖詩二首

巧佞巧佞讒言興兮營營習習似青蠅兮以白為黑在  
汝口兮汝非蠱毒何厚兮巧佞巧佞一何工矣伺間  
伺忿言必從矣朋黨噂喙自相同矣浸潤之譖傾人墉  
矣成人之美君子貴焉攻人之惡君子愧焉汝何人斯  
譖毀日繁子實無罪何騁汝言番番緝緝讒言側入君  
子好讒如或弗及天疾讒說汝其至矣無妄之禍行將  
及矣泛泛游鳧弗制弗拘行藏之徒或智或愚維余小

子未明茲理毀與行俱言與釁起我其懲矣我其悔矣  
豈求人兮思想在已

疾倖詩

彼諂諛兮人之蠹兮刺促昔粟罔顧耻辱以求媚兮邪  
干側入如恐弗及以自容兮志行褊小好習不道朝挾  
其車夕承其輿或騎或徒載奔載趨或言或笑曲事親  
要正路不由邪徑是蹈不識大猷不知語言其朋其黨  
其徒實繁有詭其行有佞其音遽蔭戚施邪媚是欽既

讒且妒以逞其心是信是任亂是

北史作敗其

以多其始不

慎末如之何習習宰詬營營無極梁丘寡智王鮒淺識

伊戾息夫異世同力江充趙高甘言似直豎刁上官擅

生羽翼乃如之人僭爽其德豈徒喪邦又亦覆國嗟爾

中下其親其昵不謂其非不覺其失好之有年寵之有

日我思古人心焉若疾百凡君子宜其慎矣覆車其一作

之鑒近可信矣言既備矣事既至矣反是不思維塵及

矣

盧元明

字幼章范陽涿人涉歷羣書兼有文義永安初兼尚書令孝武登阼遷歷尚書右丞相轉

散騎  
常侍

晦日汎舟應詔

輕灰吹上管落棠飄下蒂遲遲春色華  
晚晚年光麗

李騫

字布義趙郡平棘人博涉經史文藻富瞻位散騎常侍尚書左丞使梁坐事免後除黃門侍郎

贈親友

北史曰騫為尚書左丞坐免論者以為非罪騫嘗贈親友盧元明魏收詩蓋失職之志云

幽棲多暇日總駕萃荒坳南瞻帶宮雉北睇距哇瀛流

火時將末懸炭漸云輕寒風率已厲秋水寂無聲層陰蔽長野凍雨暗窮汀侶浴浮還沒孤飛息且驚三禡俄終歲一九曾未營閒居同洛涘歸身歛武城稍旅原思

藿坐夢尹勤荆監河愛斗一作水蘇子借餘明益州達

友趣廷尉辯交情豈若忻蓬華收志偶沈冥懸炭事見淮南子亦

古候氣之法說林懸羽與炭而知燥濕之氣

温子昇字鵬舉其先太原人祖避難家於濟陰博覽百家文章清婉熙平初舉高第擢御史孝莊

即位補南主客郎中遷散騎常侍中軍大將軍領本州大中正齊文襄引以為諮議及元瑾荀濟等



作亂文襄疑子昇知  
其謀下晉陽獄死

白鼻騮

以下  
樂府

少年多好事攬轡向西都  
相逢狹斜路駐馬詣當壚

結襪子

誰能訪故劍會自逐前魚  
裁紉終委篋織素空有餘

安定侯曲

封疆在上地鍾鼓自相和  
美人當窻舞妖姬掩扇歌

燉煌樂

客從遠方來相隨歌且笑自有燉煌樂不減安陵調

涼州樂歌二首

遠遊武威郡遙望姑臧城車馬相交錯歌吹日縱橫  
路出玉門關城接龍城坂但事絃歌樂誰道山川遠

擣衣

詩話  
補遺

長安城中秋夜長佳人錦石擣流黃香杵紋砧知近遠  
傳聲遞響何淒涼七夕長河爛中秋月光蠟燭塞邊  
絕候鴈鴛鴦樓上望天狼

從駕幸金墉城

以下詩

茲城實佳麗，飛甍自相竝。  
膠葛擁行風，岩堯閱流景。  
御溝屬清洛，馳道通丹屏。  
湛淡水成文，參差樹交影。  
長門久已閉，離宮一何靜。  
細草綠玉階，高枝蔭桐井。  
微微夕渚暗，肅肅暮風冷。  
神行揚翠旗，天臨肅清警。  
伊臣從下列，逢恩信多幸。  
康衢雖已泰，弱力將安騁。

春日臨池

光風動春樹，丹霞起暮陰。  
崖峩映連壁，飄颻下散金。  
徒

自臨濠渚空復撫鳴琴莫知流水曲誰辯遊魚心

詠花蝶

素蝶向林飛紅花逐風散花蝶俱不息紅素還相亂  
芬芬共襲手葳蕤從可玩不慰行客心遽動離居歎

相國清河王挽歌

高門詎改轍曲沼尚餘波何言吹樓下翻成薤露歌

高孝緯

空城雀

百雉何寥廓四面風雲上  
紉素久為塵池臺尚可仰  
啾啾噪城鬱鬱無歡賞  
日暮縈心曲橫琴聊自獎

王容

大堤女

寶髻耀明璫香羅鳴玉珮  
大堤諸女兒一一皆春態  
入花花不見穿柳柳陰碎  
東風拂面來由來亦相愛

王德

春詞

春花綺繡色春鳥絃歌聲春風復蕩漾春女亦多情愛  
將鶯作友憐傍錦為屏回頭語夫婿莫負艷陽征

周南

晚粧

青樓誰家女當窻啓明月拂黛雙蛾飛調脂艷桃發舞  
罷鸞自羞妝成淚仍滑願託嫦娥影尋卽縱燕越

祖叔辨

千里思

細君辭漢宇王媵即虜衢寂寂人逕阻迢迢天路殊憂  
來似懸旆淚下若連珠無因上林鴈但見邊城蕪

袁曜

北史袁曜字景騰博學有俊才仕魏為  
車騎將軍清河王懌文學未知是否

釋奠詩

南庠貴齒東學尚親卑躬下問降禮師臣圓冠濟濟方  
領恂恂 肄業既終舍奠爰始韶音遞奏笙鏞間起茨  
夏愔愔晬容亶亶德奢并慙陳信焉恥

王肅妻謝氏

贈王肅

伽藍記曰洛陽城南正覺寺尚書令王肅所立也肅在江南娶謝氏女及至京師復尚公主其後謝氏為尼來奔作詩贈肅公主亦代肅贈謝肅聞之甚恨遂造正覺寺以愆之

本為箔上蠶今作機上絲得絡逐勝去頗憶纏綿時

陳留長公主

代答詩

鍼是貫紳物目中常絰絲得帛縫新去何能衲故時

雜曲歌辭

無名氏



阿那瓌

北史曰阿那瓌蠕蠕國主也通典曰蠕蠕自拓拔  
初徙雲中即有種落後魏太武神廬中彊盛盡有  
匈奴故地阿那瓌孝明帝時  
蠕蠕國主辭云匈奴主也

聞有匈奴主雜騎起塵埃列觀長平坂驅馬渭橋來

楊白花

梁書曰楊華武都仇池人少有勇力容貌雄偉魏  
胡太后逼通之華懼及禍乃率其部曲降梁胡太  
后追思之不能已為作楊白花歌使宮人連臂踏  
足歌之聲甚悽惋南史曰楊華本名白花奔梁後  
名華魏名將  
大眼之子

陽春二三月揚柳齊作花春風一夜入閨闈揚花飄蕩  
落南家含情出戶脚無力拾得楊花淚沾臆秋去春還  
雙燕子願銜楊花入窠裏

雜歌謠辭

無名氏

詰汾歌

北史曰北魏聖武皇帝諱詰汾嘗田於山澤畝見  
輜輶自天而下既至見美婦人自稱天女受命相  
偶且日請還期年復會於此言終而別及期帝至  
先田處果見天女以所生男授帝曰此君之子也  
當世為帝王即始祖神  
元皇帝也故時人諺曰

詰汾皇帝無婦家力微皇帝無舅家

神元諱力微

### 咸陽王歌

北史曰後魏景明中咸陽王禧謀逆伏誅後宮人為之歌其歌遂流於江表北人在南者聞弦管奏之莫不灑泣

可憐咸陽王奈何作事誤金牀玉几不能眠夜踏霜與

露一作夜起

洛水湛湛彌岸長行人那得渡

### 裴公歌

北史曰裴俠大統中為河北郡守躬履儉素愛民如子郡舊有漁獵夫三十人以供郡守俠曰以口

腹役人吾所不為也悉罷之又有丁三十人供郡  
守役使亦不私竝收庸為市官馬歲時既積馬遂  
成羣去職之日一  
無所取民歌之云

肥鮮不食丁庸不取裴公貞惠為世規矩

李波小妹歌

魏書曰廣平人李波宗族彊盛殘掠不已公私咸  
患百姓為之語云云刺史李安世設方畧誘波等  
殺之州  
內肅然

李波小妹字雍容褰裾逐馬如卷蓬左射右射必疊雙  
婦女尚如此男子安可逢

趙郡謠

北史曰後魏李曾孝武時為趙郡太守令行禁止并州丁零數為山東害知曾能得百姓死力不敢入境賊於常山界得一死鹿賊長謂趙郡地也責之還令送鹿故處其見憚如此郡人為之謠

詐作趙郡鹿猶勝常山粟

二拔謠

北史曰永熙二年竇泰破余朱榮神武入洛余朱仲部下都督張子期自滑臺歸命神武斬之斛斯椿由是不安乃與南陽王竇炬等構神武於魏帝故魏帝心貳於賀拔岳初孝明之時洛下以兩拔相擊謠言云云好事者以二拔謂拓拔賀拔言俱將衰之兆

銅拔打鐵拔元家世將末

曲堤謠二首

北史曰後魏宋世良孝莊時為清河太守才識閒  
明尤善政術郡東南有曲堤成公一姓阻而居之

羣盜多萃於此人為之語云云世良  
施八條之制盜奔他境人又謠云云

寧度東吳會稽不歷成公曲堤

曲堤雖險賊何益但有宋公自屏跡

河東謠  
歌元淑

秦州河中杼柚代秦元公至止田疇始理

洛中童謡二首

北史曰余朱彥伯節閔帝時封博陵郡王位侍中及張勸等掩襲余朱世隆神武執彥伯與世隆同斬於閭闔門外懸首於斛斯椿門

樹先是洛中謡云云至是竝驗

三月末四月初揚灰簸土覓真珠

頭去項脚根齊驅上樹不須梯

後魏宣武孝明時謡

北史曰孝武帝永熙三年遇酖而崩初宣武孝明問謡云云識者以為索謂魏本索髮焦梨狗子指

宇文泰秦泰小  
字黑獺也

狐非狐 貉非貉 焦梨狗子齧斷索

東魏童謠

魏紀曰孝武帝既入關渤海王高歡議立清河王子善見以奉明帝之後是為孝靜皇帝遷都於鄴為東魏自是軍國政務皆歸相府先是童謠云云按青雀子謂靜帝實清河王之世子鸚鵡謂齊神武即高歡也後竟為齊所滅

可憐青雀子飛來鄴城裏羽翮垂欲成化作鸚鵡子

府君頌

北史曰呂顯字子明皇始初拜鉅鹿太守清身奉公百姓頌之



時惟府君克清克明緝我荒土人胥樂生願壽無疆以  
享長齡

### 三王歌

後魏書曰濟南王元或與從兄安豐王  
延明中山王熙齊名時人為之語曰

三王楚楚盡琳瑯未若濟南備圓方

### 袁祖謠

北史曰祖瑩與陳郡袁翻  
齊名秀出時人為之語曰

京師楚楚袁與祖洛陽翩翩祖與袁

李謚歌

北史曰李謚少好學周覽百氏初師事小學博士孔璠數年後璠還就謚請業同門生為之語曰

青成藍藍謝青師何常在明經

古詩紀卷一百十九

欽定四庫全書

古詩紀卷一百二十

明 馮惟訥 撰

北齊第一

邢邵

字子才河間鄭人十歲能屬文日誦萬餘言文章典麗既瞻且速釋褐為魏武掾即累除國子祭酒齊宣武輔政徵為賓客除黃門侍郎遷太常卿授特進邵率情簡素博覽墳籍公私諮稟為世

指南  
焉

思公子

樂府

綺羅日減帶桃李無顏色思君君未歸歸來豈相識

三日華林園公宴

以下詩

迴鑿自樂野弭蓋屬瑤池五丞接光景七友樹風儀芳  
春時欲遽覽物惜將移新萍已冒沼餘花尚滿枝草滋  
徑蕪沒林長山蔽虧芳筵羅玉俎激水漾金卮歌聲斷  
以一作續舞袖合還離

冬夜酬魏少傅直史館

一作酬魏收  
冬夜直史館

年病從橫至動息不自安兼豆未能飽重裘詎解寒况  
乃冬之夜霜氣有餘酸風音響北牖月影度南端燈光

明且滅華燭新復殘  
衰顏依候改壯志與時闌  
體羸不盡帶髮落強扶冠  
夜景將欲近夕息故無寬  
忽有清風贈辭義婉如蘭  
先言歎三友次言慙一官  
麗藻高鄭衛專學美齊韓  
審諭一作雖有屬筆削少能干一作高足  
自無限積風良可搏空想青門易寧見赤松難寄語東  
山道高駕且盤桓

冬日傷志篇

昔時惰遊士任性少矜裁  
朝驅一作馳一作瑪瑙勒夕銜熊耳

杯折花步

一作贈

淇水撫琴望叢臺繁華夙昔改衰病一

時來重以三冬月愁雲聚復開天高日色淺林勁鳥聲

哀終風激簷宇餘雪滿條枚遨遊昔宛洛踟躕今草萊

時事方去矣撫已獨傷懷

一作懷哉

七夕

詩彙作宗  
懷者非

盈盈河水側朝朝長歎息不怯漸衰苦波流詎可測秋  
期忽云至停梭理容色束衿未解帶迴鑿已沾軾不見  
眼中人誰堪機上織願逐青鳥去暫因希羽翼

齊韋道遜晚春宴

觀題似韋道遜所作文苑  
英華作邢邵姑列于此

日斜賓館晚風輕  
麥候初簷喧巢幕  
燕池躍戲蓮魚石  
聲隨流響桐影傍  
巖踈誰能千里外  
獨寄八行書

應詔甘露詩

膏露且漸洽凝液  
洩於旗草木盡霑  
被玉散復珠霏誰  
謂穹昊遠道合若  
應機

賀老人星詩

瑞動星光照化穉  
月輪重庶徵符祉  
錄將以贊時雍

魏收

字伯起鉅鹿下曲陽人仕魏典起居注魚中書舍人與溫子昇邢子才齊名世號三才天保初

除中書令兼著作即後除光祿大夫尚書右僕射特進謚文貞收有才無行在京洛輕薄尤甚人號

為驚

蛺蝶

美女篇二首

以下樂府

楚襄遊夢去陳思胡洛歸參差結旌旆掩靄頓駮駢  
化看臺曲駭散屬川沂仍令賦神女俄聞要處妃照梁  
何足豔昇霞反奮飛可言不可見言是復言非

闕

我帝更朝衣擅寵無論賤入愛不嫌微智



瓊非俗物羅敷本自稀  
居然陋西子定可比南威  
新吳何為誤舊鄭  
果難依甘言誠易污  
得失定因機無憎藥  
英妬心賞易侵違

永世樂

綺窻斜影入上客  
酒須添翠羽方開美  
鉛華汗不霑關  
門今可下落珥不相嫌

擢歌行

雪溜添春浦  
花水足新流  
桃發武陵岸  
柳拂武昌樓

挾瑟歌

春風宛轉入曲房，兼送小苑百花香。  
白馬金鞍去未返，紅妝玉筍下成行。

後園宴樂

以下詩

東馬輕燕外，獵雉陋秦中。  
朝車轉夜轂，仁旗指日風。  
武宴臨平圃，展衛寫屠穹。  
積崖疑造化，導水逼神功。  
樹靜歸煙合，簾踈反照通。  
一逢堯舜日，未暇北山叢。

喜雨

霞暉染刻棟礎潤上雕楹神山千葉照仙草百花榮瀉  
溜高齋響添池曲岸平滴下如珠落波迴類壁成氣調  
登萬里年和欣百靈定知丹甌出何須銅雀鳴

看柳上鵲

背歲心能識登春巢自成立枯隨雨霽依枝須月明疑  
是彫籠出當由抵玉驚間關拂條軟迴復振毛輕何獨  
離婁意傍人但未聽

晦日汎舟應詔

裊裊春枝弱，關關新鳥呼。  
棹唱忽逶迤，菱歌時顧慕。  
睿賞芳月色，宴言忘日暮。  
游豫慰人心，照臨康國步。

月下秋宴

此夕甘言宴，月照露方塗。  
使星疑向蜀，劍氣不關吳。  
良交契金水，上客慰萱蕪。  
何必應劉輩，還來遊鄴都。

五日

麥涼殊未畢，蜩鳴早欲聞。  
喧林尚黃鳥，浮天已白雲。  
辟兵書鬼字，神印題靈文。  
因想蒼梧郡，茲日祀東君。

庭栢

古松圖偃蓋新栢寫鑪峰凌寒翠不奪迎暄綠更濃茹  
葉輕沈體咀實化衰容將使中臺麝違山能見從

蜡節

凝寒迫清祀有酒宴嘉平宿心何所道藉此慰中情

祖珽

字孝徵瑩之子神清機警詞藻道逸少馳令譽為當世所推起家秘書郎後主時佞于陸媪拜

尚書左僕射封燕國公專主撰衡後以罪出為北徐州刺史

從北征

翠旗臨塞道靈鼓出桑乾祁山斂雰霧瀚海息波瀾  
成亭秋雨急關門朔氣寒方繫單于頭歌舞入長安

望海

登高臨巨壑不知千萬里雲島相接連風潮無極已  
時看遠鴻度乍見鷺鷥起無待一作不假送將歸自然傷客子

挽歌

昔日一作時驅馬謁帝長楊宮旌懸白雲外騎獵紅塵  
中今來向漳浦素蓋轉悲風榮華與歌笑萬事盡成空

裴讓之

字士禮河東聞喜人少好學有文情魏天平中舉秀才遷主客郎中書舍人散騎常侍

及齊受禪封宜都縣男尋除清河太守後被罪賜死

有所思

夢中雖暫見及覺始知非  
展轉不能寐徙倚獨披衣  
悽悽曉風急晻晻月光微  
空室常達旦所思終不歸

從北征

沙漠胡塵起關山烽燧驚  
皇威奮武略上將總神兵  
高臺朔風駛絕野寒雲生  
匈奴定遠近壯士欲橫行

公館宴酬南使徐陵

嵩山表京邑鍾嶺對江津  
方域殊風壤分野各星辰  
出境君圖事尋盟我恤鄰  
有才稱竹箭無用忝絲綸  
列樂歌鐘響張旃玉帛陳  
皇華徒受命延譽本無因  
韓宣將聘楚申胥欲去秦  
方期一作當飲河朔  
翻屬卧漳濱  
禮酒盈三獻賓筵盛八珍  
歲稔鳴銅雀兵戢坐金人  
雲來朝起蓋日落晚推輪  
異國猶兄弟相知無舊新

裴訥之

字士言讓之弟純謹有局量弱冠為平原公掌書記文宣朝累官至太子舍人



鄴館公宴

英華作奉  
使至鄴館

晉楚敦盟好僑札同心賞禮成樽俎陳樂和金石響朝  
雲駕馬進曉日乘龍上雙闕表皇居三臺映仙掌當階  
篁篠密約岸荷蕖長東帶盡欣娛誰言鶩歸兩

蕭祇

字敬式梁南平王偉之次子封定襄侯侯景亂  
起兵內援會州人以城應景遂奔東魏歷位太

子少傅齊天保初授右

光祿大夫國子祭酒

香茅

鴉鳩芳不歇霜繁綠更滋擢本同三脊流芳有四時粗

根縮酒易結解舞蠶遲終當入楚貢豈羨詠陳詩

和迴文詩

和湘東王後園

危臺出岫迴曲澗上橋斜池蓮隱弱芰徑篠落藤花

蕭放

字希逸祇之子襲父爵為清河郡公武平中待詔文林館性好文詠頗善丹青見知齊後主累

遷太子中庶子散騎常侍

冬夜詠妓

佳麗盡時年合暝不成眠銀龍銜燭燼金鳳起爐煙吹  
箎先弄曲調箏更撮弦歌還團扇後舞出妓行前絕代

終難及誰復數神仙

詠竹

懷風枝轉弱防露影逾濃  
既來丹穴鳳還作葛陂龍

劉逖

字子長彭城人齊文襄以為永安公叅軍武成時遷散騎常侍未幾與崔季舒等同戮

對雨

重輪宵犯畢行雨旦浮空  
細落疑含霧斜飛覺帶風  
濕槐仍足綠沾桃更上紅  
無由似玄豹縱意坐山中

秋朝野望

駐車憑險岸飛蓋歷平湖菊寒花稍發蓮秋葉漸枯向  
浦低行鴈排空轉噪鳥若將君共賞何處減城隅

浴溫湯泉

聲偶作劉  
遜詩非也

驪岫猶懷土新豐尚有家神井堪消疹溫泉足蕩邪紫  
苔生石岸黃沫擁金沙振衣殊未已翻能停使車

清歌發

扇中通曼臉曲裏奏陽春久應迷座客何啻起梁塵

馬元熙

字長明河間人敬德之子少傳父業魚長文  
藻以通直待詔文林館武平中授皇太子孝

經在內甚得名譽隋開  
皇中終於秦王文學

日晚彈琴

上客敞前扉鳴琴對晚暉  
掩抑歌張女淒清奏楚妃  
稍視紅塵落漸覺白雲飛  
新聲獨見賞莫恨知音稀

盧詢祖

范陽涿人有術學文辭華美詢祖與宗人思道俱為北州人俊魏收揚譽思道而以詢祖

為不及邢子廣曰詢祖有規檢禰衡思道無冰稜文舉後頗折節愿太子舍人司徒記室卒

趙郡王配鄭氏挽詞

北史趙郡王睿齊神武從子也娶鄭述祖女為妃

君王盛海內伉儷盡寰中  
女儀掩鄭國嬪容映趙宮  
春

豔桃花水秋度桂枝風遂使叢臺夜明月滿牀空

盧詢

名見顏氏家訓曰范陽盧詢疑即盧詢祖也樂府作陳人

中婦織流黃

別人心已怨愁空日復斜然香望韓壽磨鏡待秦嘉殘  
絲愁績爛餘織恐縑賒支機一片石緩轉獨輪車下簾  
還憶月挑燈更惜花似天河上景春時織女家

高昂

字教曹北海蔣人膽力過人姿采殊異少不師訓專事馳騁齊神武起昂傾意附之因成霸業

除侍中司徒兼西南道都督而教曹酷好為詩雅有情致時人稱焉○見太平廣記

征行詩

隴種千口牛泉連百壺酒朝朝圍山獵夜夜迎新婦

從軍與相州刺史孫騰行路難

春甲長驅不可息六日六夜三度食初時關言作虎牢  
更被處置河橋北回首絕望便蕭條悲來雪涕還自抑

贈弟季式

季式為濟州刺史  
勸酒乃贈

憐君停欲死天上人間無可比走馬海邊射遊鹿偏坐

石上彈鳴雉昔時方伯願三公今日司徒羨刺史

鄭公超

後主時為奉朝請待詔文林館與祖珽等同撰御覽

送庾羽騎抱

舊宅青山遠歸路白雲深  
遲暮難為別搖落更傷心  
空城落日影迴地浮雲陰  
送君自有淚不假聽猿吟

楊訓

後主時為通直散騎侍即待詔文林館同脩御覽

羣公高宴

中郎敷奏罷司隸坐朝歸開筵引貴客  
饌玉對春暉塵



起金吾騎香逐令君衣綠酒犀為椀鳴琴寶作徽寸陰  
良可惜千金本易揮

袁爽

字元明陳郡人梁司空昂之孫蕭莊時以侍中奉貢至齊及莊敗除琅邪王儼大將軍諮議入

文林館遷  
太中大夫

### 從駕遊山

天遊響仙蹕春望動神衷澗水含初溜山花發早叢玉  
輿明淑景珠旗轉瑞風平原與上路一作洛佳氣遠蒼蒼

荀仲舉

字士高潁川人世江南仕梁為南沙令後至北齊入文林館以年老家貧出為義寧太守

○樂府玉臺  
俱作陳人

銅雀臺

高臺秋色晚直望已悽然  
况復歸風便松聲入斷弦  
淚逐梁塵下心隨團扇捐  
誰堪三五夜空對月光圓

蕭愨

字仁祖蘭陵人梁宗室上黃侯暉之子天保中入齊武定中為太子洗馬後主時為齊州錄事

參軍待詔文林館後入隋

臨高臺

崇臺高百尺迥出望仙宮  
畫拱浮朝

一作雲

氣飛梁照晚

虹小衫飄霧縠艷粉拂輕紅  
笙吹汶陽篠琴奏嶧山桐  
舞逐飛龍引花隨少女風  
臨春今若此極宴豈無窮

上之回

拾遺題  
云巡省

發軔城西時回輿事北遊山  
寒石道凍葉下故宮秋朔  
路傳清警邊風卷畫旒  
歲餘巡省畢擁仗一作按節返皇州

飛龍引

河曲銜圖出江上負舟歸  
欲因作雨去還逐景雲飛  
引商吹細管下徵泛長徽  
持此淒清引春夜舞羅衣

奉和濟黃河應教

樂府題云  
濟黃河

大蕃連帝室，驂駕奉皇猷。未明驅羽騎，凌晨方畫舟。津

城度維錦，岸柳夾緹油。鐘

一作鏡

聲颺別島，旗影照蒼流。

早先生劔服，朝風起節樓。滔滔細波動，裔裔輕舫浮。迴  
橈避近磧，放舳下前洲。全疑上天漢，不異謁蓬丘。望知  
雲氣合，聽識水聲秋。從君何等樂，喜從神仙遊。

和崔侍中從駕經山寺

鈞陳夜警，徼河漢曉。叅

一作縱

橫游騎，騰文馬前驅。轉翠

旌野禽喧曙色山樹動秋聲雲表金輪見巖端畫拱明  
塔疑從地涌蓋似積香成泉高下溜急松古上枝平儀  
台多北思麗藻蔚綠情自嗤非照廡一作乘何以繼連城

奉和悲秋應令

英華作  
王胄

秋天擬文學秋水擅莊蒙草濕蒹葭露波卷洞庭風便  
坐斲桑葉長坂歇蘭蓂簷喧猶有燕阪靜未來鴻蟬噪  
聞疑斷池清映似空劉安悲落木曹植歎征蓬重明豈  
凝滯無累在淵冲隨時四序合應物五情同發言形惻

隱睿作挺神功下材均朽木何以慕彫蟲

屏風

秦皇臨碣石漢帝幸明庭非關重遊豫直是愛長齡讀  
記知州所觀圖見岳形曉識仙人氣夜辨少微星服銀  
有秘術蒸丹傳舊經風搖百影樹花落萬春亭飛流近  
更白叢竹遠彌青逍遙保清暢因持悅性情

奉和元日

帝宮通夕燎天門拂曙開瑞雲生寶鼎榮光上露臺華

山不凋葉宜城萬壽杯遙見飛鳧下懸知葉縣聲偶作令來

奉和初秋西園應教

池亭三伏後林館九秋前清冷間泉石散漫雜風煙  
蕖開千葉影榴艷百枝然約嶺停飛旆凌波動畫船

奉和冬至應教

天宮初動磬緹室已飛灰暮風吹竹起陽雲覆石來  
拆水開荔色除雪出蘭栽慙無宋玉辨濫吹楚王臺

奉和望山應教

仙遊本多趣復此上秋初巖低石倒險嶺高松更踈峯  
形疑鳥翅塞路似狼居瞻望情無已詞殫意有餘

奉和詠龍門桃花

舊聞開露井今見植龍門樹少知非塞花高異少源論  
時應未發故欲影歸軒祗言經摘罷猶勝逐風翻

春庭晚望

春庭聊縱望樓臺自相隱窻梅落晚花池竹開初筍泉  
鳴知水急雲來覺山近不愁花不飛到畏花飛盡



秋思

顏氏家訓曰蘭陵蕭愨工於篇什嘗有秋思詩云芙蓉露下落楊柳月中踈時人未之賞也吾愛其蕭散宛然在目潁川荀仲舉卿瑯諸葛漢亦以為爾而盧思道之徒雅所不愜

清波收潦日華林鳴籟初芙蓉露下落楊柳月中踈燕  
幃細綺被趙帶流黃裾相思阻音息

玉臺作信

結夢感離居

聽琴

洞門涼氣滿閒館夕陰生弦隨流水急調雜秋風清掩  
抑朝飛弄淒斷夜啼聲至人齊物我持此悅高情

和司徒鎧曹陽辟疆秋晚

辟疆休之子

葉疎知樹落香盡覺荷衰山數良多思田園聊復歸

春日曲水

雜言○初學  
記作春賦

落花無限數飛鳥排花度禁苑至饒風吹花春滿路巖  
前片石迴如樓水裏連沙聚作洲二月鶯聲纔欲斷三  
月春風已復流分流繞小度塹水還相注山頭望水雲  
水底看山樹舞餘香猶存歌盡聲猶住麥壘一驚暈菱  
潭兩飛鶯飛鶯復鶯暈傾曦帶掩扉芳颺翼還憶藻露

挹行衣

蕭轂

樂府英華並作蕭轂  
苑詩類選作蕭慙

野田黃雀行

弱軀媿

一作慙

彩飾輕毛非錦文不知鴻鵠志非是鳳凰

羣作風隨濁

一作濯

雨入曲應玄雲空城舊侶絕滄海故

交分寧死明珠彈且避鷹將軍

陽休之

字子烈北平無終人固之子初仕魏累官給  
事黃門侍郎入齊遷吏部尚書左僕射周武

平齊隨駕赴長安歷納言太子少保上開府  
除和州刺史隋開皇二年罷任終於洛陽

春日

遲遲暮春日  
靄靄春光上  
柔露洗金盤  
輕絲綴珠網  
漸看階蔕蔓  
稍覺池蓮長  
蝴蝶映花飛  
楚雀綠條響

詠萱草

開跗幽澗底  
散彩曲堂垂  
優柔輕露濕  
微穆惠風吹  
朝含麗景夜  
夜對華池

正月七日登高侍宴

廣殿麗年輝  
上林起春色  
風生拂彫輦  
雲迴浮綺翼

秋詩

日照前窻竹露濕後園薇夜蛩扶砌響輕蛾遶燭飛

顏之推

字介琅非臨沂人初為梁相東王常侍元帝即位以為散騎侍郎後為周軍所破奔齊累

官黃門侍郎平原太守齊亡入周為御史上士隋開皇中太子召為文學以疾終

神仙

紅顏恃容色青春矜盛年自言曉書劍不得學神仙風  
雲落時後歲月度人前鏡中不相識捫心徒自憐願得  
金樓要思逢玉鈐篇九龍遊弱水八鳳出飛煙朝遊采

瓊實夕宴酌膏泉崢嶸下無地列缺上陵天舉世聊一  
息中州安足旋

古意二首

十五好詩書二十彈冠仕楚王賜顏色出入章華裏作  
賦凌屈原讀書誇左史數從明月宴或侍朝雲祀登山  
摘紫芝泛江採綠芷歌舞未終曲風塵暗天起吳師破  
九龍秦兵割千里狐兔穴宗廟霜露沾朝市壁入邯鄲  
宮劍去襄城水未獲殉陵墓獨生良足耻憫憫思舊都

惻惻懷君子白髮闚明鏡憂傷沒余齒

寶珠出東國美玉產南荆隋侯曜我色卞氏飛吾聲已  
加明稱物復飾夜光名驪龍旦夕駭白虹朝暮生華彩  
燭兼乘價值詎連城常悲黃雀起每畏靈蛟迎千刃安  
可捨一毀復難營昔為時所重今為時所輕願與濁泥  
會思將垢石并歸真川岳下抱潤潛其榮

從周入齊夜度砥柱

梁詞人麗句作惠慕道  
士詩題云犯虜將所作

北史本傳曰荆州為周軍所破大將軍李穆送之  
推往弘農令掌其兄陽平公遠書翰過河水恭長

具船將妻子奔齊經砥  
柱之險時人稱其勇決

俠客重艱辛夜出小平津馬色迷關吏雞鳴起戍人露  
鮮華劍彩月照寶刀新問我將何去北海就孫賓

和陽納言聽鳴蟬篇

隋盧思道同賦

聽秋蟬秋蟬非一處細柳高飛夕長楊明月曙  
聽亂起秋聲參差攪人慮單吟如轉簫羣噪學調笙  
風飄流曼響多含斷絕聲垂陰自有樂飲露獨為清  
短綫何足貴薄羽不羞輕螳螂翳下偏難見翡翠竿  
頭絕易驚容止



由來桂林苑無事淹留南斗城城中帝皇里金張及許  
史權勢熱如湯意氣誼城市劍影奔星落馬色浮雲起  
鼎俎陳龍鳳金石諧宮徵關中滿季心關西饒孔子詎  
用虞公立國臣誰愛韓王游說士關紅顏宿昔同春花  
素鬢俄頃變秋草中腸自有極那堪教作轉輪車此篇見初

學記紅顏以下  
脫誤俟再考

趙儒宗

詠龜詩

有靈堪託夢無心解自謀不能著下伏強從蓮上遊負  
圖非所冀支牀空見留儻蒙一曳尾當為屢回頭

陸法和

不知何許人隱於江陵百里洲妙解神術預見萌兆再為元帝破賊帝以法和為都督郢

州刺史封江乘縣公元帝敗入齊文宣以為大都督荆州刺史湘郡公無病而終

### 讖詩二首

北史本傳曰法和書其所居屋壁而塗之及剝落有文二首

十年天子為尚可百日天子急如火周年天子迭代坐

隋書五行志曰時文宣帝享國十年而崩廢帝嗣立百餘日用替厥位孝昭即位一年而崩此其效也

一母生三天兩天共五年

婁太后生三天子自孝昭即位至武成傳位後主共五年

馮淑妃

名小憐齊後主大穆后從婢也穆后愛哀以五月五日進之號曰續命慧黠工歌舞後主

惑之立為左皇后周師取平後主以淑妃奔洪洞成復奔青州為周武所獲以賜代王達達甚嬖之

感琵琶弦

淑妃侍代王達彈琵琶因弦斷作詩曰

雖蒙今日寵猶憶昔時憐欲知心斷絕應看膝上弦

盧士深妻崔氏

蹟面辭

虞世南史略曰北齊盧士深妻崔林義  
之女有才學春日以桃花噴兒面呪曰

取紅花取白雪與兒洗面作光悅取白雪取紅花與兒  
洗面作妍華取花紅取雪白與兒洗面作光澤取雪白  
取花紅與兒洗面作華容

古詩紀卷一百二十